



**Komunikadu Imprensa**  
**Parlamentu Nasionál**  
Dili, 26 Setembru 2018

**JSMP hasoru-malu ho Prezidente Parlamentu Nasionál no apresenta deskobrentu sira kona-ba dezvoltimentu lejislativu iha Timor-Leste**

Iha Kinta-feira, 20 Setembru 2018, ekipa JSMP hasoru-malu ho Prezidente Parlamentu Nasionál Sua Exelénsia Sr. Arão Noe Amaral, Primeiru-Vise PPN, Sua Exelénsia Sra. Maria Angelina Sarmiento no Segundu-Vise Prezidente PN, Sua Exelénsia Sr. Luis Roberto da Silva, Sekretaria ba Prezidente Parlamentu Nasionál, Xefe Gabinete no Asesor sira, hodi apresenta no diskuti progresu no dezafiu sira kona-ba dezvoltimentu lejislativu iha Timór-Leste, iha Salaun Reuniaun Gabinete Parlamentu Nasionál nian.

Sourumutu ne'e ho objetivu atu apresenta JSMP ninia deskobrentu sira ne'ebé JSMP hetan liuhosi atividade observaun diária no regularmente iha Parlamentu Nasionál, partikularmentu iha Komiasaun A; relaciona ho progresu, dezafiu, lakunas no defisiensia sira ne'ebé Parlamentu Nasionál enfrenta no uza momentu sira hanesan ne'e hodi rekomenda ba Parlamentu Nasionál atu hadia durante V Lejislatura nia-laran.

“JSMP buka meiu no esforsu hotu-hotu ne'ebé posivel hodi transmite faktu no deskobrimentu sira ne'ebé JSMP hetan atu ajuda instituisaun estadu sira bele ezerse sira ninia knaar ho responsavel. Ne'e forma ida atu aseguza katak PN bele funsiona tuir lei no konstituisaun haruka inklui atu hadia irregularidade no difisiensia sira ne'ebé durante ne'e afeita produtividade no qualidade PN hanesan segundu orgaun soberanu iha Estadu Repúblika Demokrátika Timor-Leste, dehan Luis de Oliveira Sampaio, Diretór Ezekutivu JSMP.

Durante sorumutuk ne'e, JSMP apresenta no subliña rezultadu observaun iha Parlamentu Nasionál sira durante iha períodu lejislativu daruak mai to'o iha lejislativu dahaat ne'ebé JSMP rejista no konsidera hanesan dezafiu no lakunas sira ne'ebé kauza inefikasia funsionamentu Parlamentu Nasionál. Asuntu sira ne'e, inklui:

- **Programa Nasionál Legislative (PNL)**

Kuaze tinan barak ona, hahu kedas 2010 JSMP halo knaar importante hodi observa ba servisu Parlamentu Nasionál. Atraves husi servisu observaun ne'e JSMP deskobre katak problema substansiál ida ne'ebé afeita tebes ba servisu Parlamentu Nasionál, mak seidak konsege institualiza Programa Lejislativu Nasionál (PNL). JSMP hanoin katak bainhira PN iha PNL, ne'e sei ajuda PN identifika prióridade lejislativu sira kada tinan. JSMP mós hanoin katak ho PNL ne'e sei laiha tan esbozu lei sira ne'ebé pendente no sai kaduka ne'ebé hanesan akontese ona iha tempu sira liu ba kotuk.

- **Intrepretasaun kona-ba imunidade no importante atu kria matadalan ba interpretasaun**

Kestaun kona-ba interpretasaun kona-ba imunidade sei nafatin problemátiku. Iha JSMP nia observasaun relasiona ho kazu sira ne'ebé envolve membru deputadu no membru governu ativu sira, sei nafatin hasoru dezafiu tanba iha tendensia katak iha kazu balun membru deputadu no membru governu rekuza atu kolabora ho autóridade judisiáriu sira. Kestaun ne'e mosu tanba iha interpretasaun ámbigu no inkonsistensia kona-ba imunidade ne'ebé asegura iha Konstituisaun no Rejimentu Parlamentu Nasionál. Tanba ne'e, JSMP hakarak rekomenda atu Parlamentu Nasionál atu dezentolve matadalan interpretasaun unifikadu ida, atu ajuda klarifika diferensias no kunfuzau hirak ne'e no iha sentidu no situasaun saida maka deputadu no membru governu sira uza sira nia imunidade.

- **Kestaun pontualidade, disiplina no falta laho justifikasaun**

Iha períodu lejislatura sira liu ba kotuk, liuliu iha lejislatura daruak no datoluk nian, JSMP nota katak deputadu sira kontinua la kumpri Rejimentu Parlamentu Nasionál nian kona-ba pontualidade servisu, reuniaun Plenaria sempre hahú latuir orariu (tarde) no dalaruma la bele halo reuniaun kompletamente tanba kórum la-to'ó. Maibé iha lejislatura dalimak ne'e sesaun plenaria komesa hahu tuir orariu, JSMP hanoin importante atu deputadu sira bele mantein prátika diak ne'e hodi halo tuir rejimentu Parlamentu. Nune'e mós kestaun kona-ba falta la ho justifikasaun, ne'e sai hanesan kestaun no preokupasaun tanba iha ligasaun metin ho produtividade PN inklui kona-ba lei pendente sira tanba kórum la-too liuliu deputadu sira ne'ebé falta sei ho justifikasaun. Relasiona ho kestaun ne'e JSMP hanoin importante atu PN asegura implementasaun ho efektivu no konsistente ba deputadu sira hotu ne'ebé lakumpri sira nia dever tuir lei no Rejimentu Parlamentu nian.

- **Prioritizasaun ba lei pendente sira no alterasaun ba lei ezistensia sira**

Iha relasaun kestaun kona-ba lei pendente sira, JSMP nafatin subliña kestaun ne'e ba Parlamentu Nasionál atu konsidera no tau iha prioridade iha agenda lejislatura dalimak ne'e. Leis hirak ne'e mak inklui Projeitu Lei Anti Korrupsaun, Proposta Lei Protesaun ba Labarik, Kriasaun Lei Orden advogado. Aleinde ne'e, rekomenda ba Parlamentu Nasionál atu bele konsidera kestaun sira kona-ba alterasaun ba lei ezistensia sira ne'ebé sei sai nafatin preokupasaun ba publiku no JSMP mak inklui: Alterasaun Lei Pensaun Vítalisisa, Kódigu Penál no Kódigu Sivíl kona-ba Kazamentu Sivíl.

Hatan ba deskobrimentu sira ne'e Prezidente Parlamentu Nasionál, Sr Exelénsia Sr. Arão Noe Amaral haktuir katak ho nia simu ho haksolok no apresia JSMP nia prezensa hodi apresenta deskobrimentu sira ne'ebé JSMP hetan iha Parlamentu Nasionál. Sr. Amaral mós rekoñese papel no prezensa konsistensia JSMP nian durante tinan 2010 to'ó ohin loron atu hare no akompañia servisu Parlamentu Nasionál nian.

Sr. Amaral valoriza informasaun ka asuntu hirak ne'ebé JSMP apresenta ne'e refleto duni situasaun sira ne'ebé Parlamentu hasoru. Sr. Amaral haktuir katak rekomendasaun sira ne'ebé JSMP hato'o ba Parlamentu Nasionál sei tau iha konsiderasaun iha lejislaura ida-ne'e. Nia subliña katak kestaun kona-ba Programa Nasionál Lejislativu, kestaun kona-ba imunidade, pontualidade, no deputadu sira falta sei justifikasaun, iha nia lideransa sei koko atu halo mudansa no sei tau iha prióridade rekomendasaun sira ne'ebé JSMP maske iha preokupasaun balu ne'ebé labele responde ka halo agora. Tanba atu implemeta buat sira ne'e hotu prezisa rekursu liuliu asesor legal no tékniku hodi halo peskiza. Nia hatutan katak Parlamentu Nasionál nia dezafiu boot ida mak la-iha rekursu sufisiente atu hare ba kestaun sira ne'e. Entretantu, kona-ba alterasaun Kódigu Penál (KP) ne'e nia dehan kaak prezisa iniklui krime inestu iha KP. Enkuantu kona-ba direitu akaridu iha Lei Pensaun Vitalisia ne'ebé altera ona, Prezidente dehan katak ida ne'e refleto esperensia hosi prátika ne'ebé mai hosi Parlamentu Portuguesa nian ne'ebé asegura kona-ba direitu ida-ne'e tanba ne'e defisil atu muda tanba bele hamosu reazem hosi deputadu anterior sira.

Iha parte seluk Primeiru-Visé Prezidente PN Sra. Maria Angelina Sarmiento reforsa katak, papel JSMP importante atu ajuda fó hanoin kona-ba prestasaun servisu Parlamentu Nasionál nian. Liután nia mós hato'o katak preokupasaun sira husi JSMP nian ne'e pertene tebes liuliu iha alterasaun KP kona-ba krime inestu. Tanba iha ona planu asaun GMPTL 2019 atu inisia artigu ida ba krime inestu.

Entretantu, Segunda-Visé Prezidente Parlamentu Nasionál, Sr. Luis Roberto da Silva, apresenta preokupasaun sira kona-ba detensaun iha prizaun preventiva ne'ebé liu prazu normal no legál, prestasaun servisu advogadu privadu sira ne'ebé karun no servisu defensória públiku ne'ebé seidak másimu no preokupasaun kona-ba lamentasaun públiku ba defensória públiku balun ne'ebé simu osan hosi kliente.

Relasiona ho preokupasaun sira ne'e, JSMP husu ba PN atu diskuti no aprova Lei Ordem ba Advogadu nu'udar meius lejítimu atu kontrola advogadu privadu sira. Enkuantu relasiona ho servisu defensória públiku JSMP rekomena se posivel husu ba PN atu halo vizita traballu ba Defensória Públiku Timor-Leste atu hare sira nia progresu no dezafiu sira, inklui buka tuir informasaun kona-ba preokupasaun sira ne'e.

Sorumutu ne'e termina ho intrega rezumu relatóriu submisaun JSMP ba Prezidente Parleментu Nasionál. Informasaun kona-ba submisaun ne'e bele asesu iha: <http://jsmp.tl/wp-content/uploads/submisaun-progresu-no-dezafiu-sira-konaba-dezenvolvimentu-lejislativu-iha-timor-leste.pdf>

Atu hetan informasaun kompletu bele kontaktu:

Luis de Oliveira Sampaio  
Diretór Ezekutivu JSMP

Email: [luis@jsmp.tl](mailto:luis@jsmp.tl)  
[www.jsmp.tl](http://www.jsmp.tl)